

皇朝經世文續編

皇朝經世文續編卷九十二目錄

工政五 運河

淮黃濟運議

汶衛濟運論

籌辦通漕要道疏

籌辦河運事宜疏

遵 旨查勘北運河工擬請疏築疏

請 飭疏濬山東滅河疏附片二

遵 旨查明四女寺哨馬營兩處滅河牆口情形疏

照章估築攔河大壩疏

奏邵宿濟漕各工擇要趕辦疏

籌辦南運滅河要工疏

運河

運道

沈兆霖

范本禮

林則徐

曾國藩

盧蔭

劉恩溥

陳士杰

覺羅成孚

曾國荃

盧士杰

李鴻章

張曜

陳重威

范本禮

陳重威

范本禮

工政五運河

淮黃濟運議

沈兆霖

黃河從古爲中國患然自宋以前不過治河而已至宋則分爲二曰河曰淮明復分爲三曰河曰淮曰運河夫
上世專去其害因收其利猶且利不勝害今則去害興利并爲一事欲去其害難乎爲利欲留其利難乎爲害
而究其弊則運河病在河河病在合淮而淮又病在合河以入海夫古之河道東北達於海其由淮入海者惟
汴泗之水耳然禹猶疏九河以分其勢而水患始定殷之世河圯矣猶未徙也周定王時河徙矣猶未決也漢
文帝武帝時始決酸棗瓠子河決矣然始趨東南繼仍歸東北入海也東漢修汴築隄從滎陽至千乘海口計
千餘里河復由東北入海合禹治河故道於是東漢至唐無河患至宋仁宗時河決大名神宗時河決澶州北
流斷絕河漸南徙至元明間而河全入於淮矣禮曰四瀆視諸侯瀆者獨也以其獨入於海故江淮河濟皆名
以瀆焉若以一淮而受黃河之水是合二瀆而爲一也然今既資以利漕矣則往者賈讓諸人隨時制宜諸策
在當時雖或可行而今日未必皆便非惟不敢導之使北抑且必欲捍之使南捍之使南則漕安而河流愈不
可測若導之使北則雖與衛河合入於海而憂又在漕故古之河患小今之河患大古之治河易今之治河難
也然則治之之法當奈何曰治運河之法莫急於濬治河之法莫妙於分治淮之法莫善於導夫運河三百餘
里西受淮水水清無害也若北受黃水東洩於江則由天妃閘而入水一石沙五斗洶涌急瀉其沙盡入運河
河狹水緩欲不淤塞而不可得積淤成板河身日高則必有泛溢之勢宜及時疏濬使河底不致壅積沙淤庶

可受以清刷濁之利而輸輓得以不阻此治運河之法也若治河則前朝河臣因黃水暴漲阻遏清口致淮水不能入閘濟運盡泛溢於高家堰堰勢告危高賢諸湖橫溢議於清河縣黃家嘴地方挑開支河以分黃勢淮遂順流入閘不爲高賢害具有成效故宋濂之言曰河流合則勢悍分則力弱譬猶百人爲一隊則其力全若以百分而爲十則頓損又以十各分爲十則全屈矣由此論之竊謂治河莫如分然上流治而下流未治也必使淮趨清口會大河入雲梯海口然後無慮而海口爲溜沙往來之地萬不可濬惟有善固堤防如平江伯築堰起武家墩經大小湖以捍淮東侵築堤起清江浦沿鉢池山柳灣浦以制河南溢便河不得不入淮淮不得不會河入海而淮始治是治淮又以導淮爲急夫水之所壅不能不潰潰則汎濫土之所淤不得不塞塞則遷徙此必然之勢也今以奔流之黃河而盡藉淮爲注瀉之區淮復合泗沂諸水以同入於海欲運河不受其害得乎故治運河者唯在以時疏濬便不淤而已治之之法皆在河淮河淮治則運道自不致於見奪矣若夫前朝之制天妃閘本有漕行則開過則閉之之策用水之利而免沙淤計誠深遠苟能參而用之不更善哉

汶衛濟運論

范本禮

元都燕京仰給東南苦轉運之不便乃用韓仲暉言引汶絕濟自安民山開河至臨清直接衛河名會通河此運河所由昉也夫古人因水爲利意亦良美然失水性之自然而惟藉人力以制之後人又用之不得其道故利之所在害即隨之大抵運河淺狹不能容水患不在不足即在有餘不足則害在運有餘則害更不止在運然用汶兼用泗汶泗交濟本無不足用衛不用漳漳衛分流又無有餘古人創制之初經營措置何嘗不盡善盡美哉夫汶之濟運始於元之畢輔國而韓仲暉繼之明之宋禮成之考畢輔國之引汶入泗也建金口壩開金口閘引泗爲府河至濟甯又築壩城壩開壩城閘引汶由洸河至濟甯又以濟甯之地北高南下恐水之易

南而難北也於是乎建天井閘以遏其南建開河閘以放其北其於地形水勢籌之熟矣至宋禮用白英之言
改築分水口於南旺而築壩於戴村自是專資汶水已失汶泗兼用之意然猶使汶水七分北行三分南行故
自南旺至臨清尚不患不足自南旺上下開建而水之北行者少安山袁家口戴家廟三開建而水之北行者
愈少故南旺以北水恆苦細其弊在損之又損也我朝張清恪公欲浚府河改分水口於南旺北使南旺以
南泗出全力南旺以北汶有專功雖改築分水口役繁費重勢所難成而挑深府河師畢輔國汶泗兼用之法
未始非補偏救弊之道也乃清恪未行以泗助汶之說而反開以漳台衛之道則又執一不通之故也夫古人
濟運獨取汶衛者良以汶衛水清無潰溢淤塞之病耳泗清故亦可引漳濁則斷不可用其勢然也清恪不知
水勢而好以多爲利是以引沁入衛議雖不行而引漳入衛卒啓大患原其引漳之意不過欲藉漳助衛豈知
衛弱漳強衛不足以容漳漳適足以奪衛貪目前之利開無窮之害其弊又在益之又益也損所不當損與益
所不當益均害也而益之害大故府河之浚可從其緩而漳河故道之復當處其先所謂急則治標也顧說者
謂漳河正流歸甯晉泊其支流則至青縣南由運入海是漳終不能不入運也曰漳至青縣南減水河卽在其
東可以暢行入海非若臨清至四女寺經行四百餘里也漳歸故道獨行溜勢稍順非若與衛合之勢盛也且
於入運之處建立插座冬春水少則啓插分漳以濟汶衛之竄夏秋水大則緊閉插洞俾漳水自行入海而漳
衛合流之處築壩堵塞如此奚患有餘至於南旺上下開啓閉有法使水常蓄於北更以挖河機器挖通府河
復引汶入泗之道挖深南旺便能多容水水漲盡蓄於南旺水竭放入北運如此又奚患不足昔人謂治黃無
一勞永逸之道吾謂治運亦然均調水勢損益得宜有治人無治法也今自黃河北徙運河情形又爲之一變
汶既不能越黃以濟運衛又不能自臨清南流安山以北所以患涸議者因欲束黃濟運是蹈徐有貞金龍口

之覆轍必不可行也考龍灣魏家灣皆有滾水壩原所以洩運河漲水於馬頰徒駭兩河今擬於壩下各開水寶門而於清平縣西博平縣南各開蓄水湖東西建插運河水漲開兩湖西插緊閉東插以蓄水運河水涸開兩湖西插及兩水寶門卽以所蓄之水濟運是所以補不足也更於戴家廟南安山開北建築堅壩使黃不得稍混入運是又所以防有餘也夫河運之法至今日而已窮然於萬無可爲之時籌一因時制宜之策雖開湖築壩不免勞民傷財而欲舍此別求恐亦更無他法也

籌辦通漕要道疏

林則徐

竊照鎮江爲漕運咽喉江浙兩省糧船皆所必由之路而每年重空往返挑浚河道蓄水提船一切機宜則惟鎮江道府縣營責成爲重其挑河例價不敷並須江蘇各屬州縣捐資協貼一遇江潮低落設法推挽勞費尤倍於平時揆其致病之由總因該處運河本係鑿山通道並無水源祇恃引江入河以資浮送而江水本不宜過大若運河灌輸盈滿於行舟固爲順利而沿江田地早已被淹如江水落低則利於洲田又不利於漕運兩者相較固係農田爲本而運道則須隨時盡力以圖補救之方臣陶澍於嘉慶二十一年巡視南漕卽以修整開座濬治練湖等事縷晰陳奏道光七年九月在巡撫任內復節次奏明籌辦開渠堤堰以資收蓄誠以江潮長落靡常緩急仍難盡恃練湖開於晉代在運河之西爲長驤諸山衆水所注唐宋元明皆治之以濟運其上接丹徒境者謂之上練湖下按丹陽城者謂之下練湖上湖高於下湖下湖又高於運河以節節傳送有湖水放一寸運河增一尺之謬與山東運河之有南旺南陽徽山諸湖情形相仿明季湖禁漸弛居民占壅遂致就壅我朝康熙十九年始定以上練湖改田升科下練湖留資蓄水然壅塞已久所蓄究屬無多而濬湖築隄經費太鉅是以屢議展寢臣陶澍在巡撫任內奏修開座亦係先其所急黃將泥閘移在張官渡以當湖

之下游俾得擎托湖流使之回漾稍濟江湖之不逮每於重運回空經過閉板蓄水曾著成效然全湖堤壩久已損壞水來則直冲而易決水去又一洩而無餘臣林則徐於道光十二年秋間親歷履勘因議擇要築壩以利節宣迨十四年四月臣陶澍閱兵過彼亦經覆勘意見相同遂卽定議籌辦並經附片奏明在案隨飭常鎮道李彥章相度機宜在於該湖頂冲之黃金壩及東岡一帶先築兩重蓄水壩加培圩埂二千八百八十丈零使水皆得入湖不令散漫又恐水勢暴猛或虞冲決因於湖之東隄添建減水石壩兩座如遇暴漲有所分洩可以保堤其通入運河之處勘得有念七家古涵較舊落之范家溝機勢更順因修復古涵以作水門并就近建設濟運石閘一座於運送軍船時放水接濟漕過之後用土填築留一涵洞以灌隄外民田是不特濟運有資卽農民亦咸霑其利臣等當卽飭道督縣勸諭得需水利之業佃或出力或出資令其舉董經理官爲督率與情咸知利益踴躍急公自夏至冬工程陸續報竣適值是冬丹徒水涸回空全進橫閘臣林則徐親駐鎮江督催提挽蒞委該道李彥章試放濟運新閘由念七家涵引水而出竟能倒漾上行至數十里之遠連放數次軍船得以銜尾南行其效頗爲顯著此道光十四年勸諭民間捐築練湖蓄水減水諸壩暨修復古涵改建濟運閘之情形也復查下游張官渡一閘爲漕船經過要津前將黃泥閘移建該處原以引截練湖便資擎托時經七載固限早逾第年來溜勢時有變遷河形漸形彎曲每遇夏秋盛漲疏洩不及金門難免逼溜卽恐有礙舟行臣等復往返札商今昔情形既殊自須變通盡利欲其順溜取直莫若因地制宜隨勘得該閘逆上相距二百丈之處溜勢漸形平緩而其地段仍在練湖濟運閘之下游疊經督匠相度僉謂宜將該閘移建於此但舊閘只有一座金門而舟輯經由絡繹不絕欲議改建尙須另籌行船之路始可截壩興工因思移地建閘原欲以殺水勢莫若改爲正閘越閘兩座尤靈遂於所勘改建之地先就南岸一邊開出越河將地勢加倍展

寬俾其可容磯心雙孔之開卽於越河圈築攔壩一道仍留靠北一半河路倫得照常行船其在攔壩以內者卽可施工先建越開俟越開工竣放水通舟然後拆去靠南之壩圈於靠北一邊以建正開如此倒換辦理往來船隻既無阻滯之虞而雙孔開成又免涌激之患將來設遇修理亦可不礙漕行但一開改爲正開中添磯心一道所需工料倍多而經費有常仍不敢遽請動帑查挑辦徒陽運河向由各屬捐資協貼本係歷有舊章若果開座鈐束得宜卽挑費亦可期節省是以改建該開仍歸官捐辦理各州縣中急公從事者尙不乏人自上年秋間集項購料興工至十二月內先將越開辦竣工料均稱堅固維時回空南下又值潮枯水涸之時當卽放出潮漲將該開下板攔蓄愈得倒漾之力江浙回空約三千艘無不由該開而下更爲濟運之明效旋卽接手砌辦正開不日亦可告成此自上年至今建改張官渡正越兩開官捐辦理之情形也惟思張官渡之下遊尙須重門收束遇水淺時上下拗板此啓彼閉始能呼吸相通卽練湖圩埂壩涵雖已擇要勸民修辦而殘缺之處尙多仍須設法籌維期湖水多蓄一分卽運河多得一分之益查張官渡迤下六十里有呂城開建自宋元祐四年其地勢正當扼要我朝雍正年間就舊基重建正越兩開嗣是越開壩壅糧船祇由正開經行嘉慶二十二年曾經估修旋又議緩上年該開金剛壩漸圯到底圯下之石堵至金門重運經臨幾爲所阻經丹陽縣督率呂城巡檢集夫搗撈始得通舟此時勘估興修實屬刻不容緩惟該開越河久爲瓦礫填壅越開石料剝損尤多今既議興修仍須兩開并辦不便偏廢現照張官渡章程先行挑浚越河趕修越開已於正月興工此時糧船正在北行仍令經由正開俟越開修竣得以通舟再將正開接手開砌所需經費亦歸本省官捐項下掙節辦理鑒不敢請動款項至練湖堤身單薄之處西南兩面尤甚其蓄水舊制本以湖心一尺八寸爲度因湖底既淤隄堰又缺遂致不能多蓄欲籌束水不外培隄但湖面正寬卽以下湖而言周圍已四十

里勢難全行圍築前於湖東一帶酌建蓄水減水各壩並築圩埂二千八百餘丈來源已有歸宿不至旁溢斜分今再勸諭民間於湖之西南兩面就近挑挖湖淤卽以挑出之土培築堤埂照舊制高一丈二尺面寬四尺兩邊二五收分更足以資攔蓄該處近湖居民有一百八十三鄉計田四萬六百八十餘畝查歷修水利本有按田出夫藥食佃力之章程茲復由該道李彥章督同鎮江府龔文煥分別出示覆加勸諭農民均各樂從臣等已飭陸續興挑卽令印委各員常川駐工稽查督辦務使逐一核實迅速蒧事俾運河長資利益漕事年勝一年以期仰副 聖主利運便民之至意

籌辦河運事宜疏

曾國藩

竊九年分江北冬漕遵照部議仍辦河運臣於十一月十二日專摺陳奏在案伏查八年分江北漕米於九年河運赴通節節阻滯水陸兼通直至十月杪始能蒧事一切經費雖由糧道王大經格外撙節不至過鉅而人事之艱時日之久較之海運難易懸殊該糧道交米事竣赴部引見現已馳回江甯臣面詢情形證以臣出京時由運河南下所見者其言多屬相符不預爲籌畫恐下次又蹈覆轍據稱本屆承辦河運在事六月之久中間處處阻滯歷歷可數如嶧縣境內之大泛口該處爲山水經由之所一遇暴漲則汎流急湍迨水退之後則沙淤停積今年漕船經過該處水深不及二尺河底碎石縱橫最礙舟行必須由山東認真與挑挖深四五人並將近灘石堆剷除與河底配平方利行駛自大泛口而北則有滕縣境內之郝山口該處爲入湖要道淺而且窄又微山湖內之王家樓滿家口安家口獨山湖內之利建閘南陽湖北之新店閘華家淺石佛閘南旺閘分水龍王廟以北之劉老口袁口閘處處淤淺或數十丈或百餘丈亦須由山東逐段勘明一律挑深方可無阻此未渡黃以前阻滯之處宜預爲籌辦者也議者謂早日開兌早日過湖卽使費力尙不愆期不知濟甯

以南淺處已多濟甯以北運河尤爲乾涸總須守候伏冰盛漲方足以資浮送至黃水穿運之處漸徙而南自安山至戴家廟三十里自戴家廟至入里廟二十二里運河舊有之堤盡被黃水衝破缺口極多黃水湍悍而勢急漕船載重而質脆斷難破浪而行需用划船下旋以立之根然後由漕船繳關步步上移否則簸蕩急溜之中無復收泊之處而十里鋪姜家莊道人橋等處又極淤淺似須由山東設法一面於淤阻處極力疏濬一面於運堤各缺口排釘木椿貫以巨索俾漕船經過有所依傍牽挽不至爲洪溜所吸倉卒失事此渡黃時阻滯情形宜預爲籌辦者也及至渡黃以後若在伏汛未落以前或易爲力若伏汛已過等候秋汛卽屬杳茫不可必之數九年在入里廟守候兩月之久可爲前鑒自張秋至臨清二百餘里河身有高有下其疏導之法須量河身之高下高者開挖宜深下者開挖稍淺庶可高低相等一律深通再於黃流已長未落之時卽下閘板蓄水以免消耗或就平水南開迤東築一挑水壩引黃入運皆多方設法力圖斡旋之策此渡黃以後運道易濶宜預爲籌辦者也山東水勢長落無定或先長而後忽落或先小而後復大漕船經由東境一千數百里向歸嶧滕魚臺濟甯東平東阿各州縣封雇船隻以備起剝之用而地方官相距甚遠兼顧不遑九年所雇剝船不免臨時逃散擬請酌改章程責成東省管河廳員雇備剝船小者裝米三十石大者至百石爲止一遇漕船淺阻斟酌起剝而由糧道按石給發飯錢以免楊腸至閘夫亦改由河員招集歸其約束一併由糧道給予工食庶不缺誤比之略改舊章宜預爲籌辦者也東平州運河之西有一鹽河倚山爲障爲東省鹽船所經要道漕船若由安山左近繞入鹽河至入里廟仍歸運道計程二百餘里較之徑渡黃流上有缺口大溜下有亂石樹椿者其難易懸殊是以商船率多避黃而趨此路上年因非運漕正道未敢試行十年行抵安山時如遇黃流過猛祇宜變通改道惟自安山三里堡入鹽河之路亦須預先勘明何處平順先立標竿爲誌免致臨時周

章此又渡黃改道宜預爲籌辦者也以上五端皆河工應辦事宜又皆在山東境內從前糧艘運北沿途修開築壩挑河過剝均由南河東河兩督臣治黃治運注意專在漕務事事各有考成處處不惜重費故能駕輕就熟事無不舉今則黃流橫決運河失修河員之經費大減河運之米數極微欲以江北一隅數萬之漕而責山東以全力治河治運未免獨爲其難然部臣所以不肯竟廢河運者亦因成法不可輕改圖事不可畏難具有遠慮丁寶楨見義勇爲力顧大局亦必不因米數太少之故而忽視沿河應辦之工糧道王大經躬肩重任既已經歷險艱茲令再試危途不得不預爲綢繆免其遲誤現在欽奉 諭旨飭派漕臣張兆棟前往山東會勘築堤東黃事宜必可與東河督臣蘇廷魁山東撫臣丁寶楨面商一切相應請 旨敕下該督撫等通籌運道全局建可久之宏謨并將 臣此摺所指興工之處分途興辦利目前之漕務 臣當飭催該糧道等趕緊兌米及早開行仰慰 宸廑

遵 旨查勘北運河工擬請疏築疏 光緒四年

兵部尚書廣 壽
左都御史賀壽慈

十月二十四日奉 上諭桂清畢道遠奏北運河上游水勢泛濫運道淤墊請派員查勘築壩東水一摺著派廣壽賀壽慈前往詳細查勘奏明辦理欽此欽遵 臣等於十一月初二日跪聆 聖訓後隨帶司員兵部員外郎貴成候補員外郎李邦楨工部候補郎中吳重熹員外郎蔡同春於初四日啓程前赴通州並率同該管道廳逐日按照原奏所指各處情形周歷履勘查潮白二河發源皆由邊外匯合於密雲縣牛欄山南流至通州城東之小河口與溫榆河合是爲北運河經流其小河口以上當通州東北境爲東西往來大道向有東浮橋一座近年伏秋盛漲兩岸均被衝刷西岸缺口尤寬遂由大道向西橫流直與溫榆河相接至今仍未掘出此潮白河泛濫之情形也溫榆河出居庸關由順義入通州北境白馬河由東直門東流來匯又南流至小河口

與潮白河合連年潮白河水勢盛漲橫灌溫榆下遊淤墊因致上遊一帶不能順軌沙窩村鈴鐺口一帶均有漫流加以白馬河淤積日高永不散漫無歸遂致北關一帶田廬均被淹沒且自西浮橋迤北改道西行直至小河口地方節節淤淺其王家垞之舊河已成平陸此溫榆泛濫淤塞之情形也臣等悉心相度潮白河水勢洶狂易於漲溢上游平曠有家堤外其餘並無堤埝若全行修築工程浩繁恐一時無從籌此鉅款現擬浮橋東岸缺口九丈西岸缺口四十餘丈一律堅築堵塞則水不致由缺口漫流而西灌溫榆之患可免矣其溫榆河上游泛濫之處利於堤防下遊淤塞之處利於疏濬現擬將沙窩村缺口二處共二十餘丈鈴鐺口缺口十丈修補堅實並於白馬河南岸起至西浮橋西岸止斜築長堤一道計長二千一百六十丈以爲北關一帶保障至溫榆改道之處形勢彎曲逼近關廂擬截灣取直挑挖舊河俾循故道再於新舊河相接之處築擋水壩二道各長十五丈河身挖出之土卽覆於西岸之上東岸通大道處另築一堤約長十二丈使河流不致東灌並將下遊自下關口起至小河口止約計一千零九十餘丈挑挖深通其白馬河下遊淤淺之處約計九百丈亦擬一律疏通使漫流之水仍由溫榆而下如此分別疏築不特民生可無淹浸之虞且於漕運亦大有裨益臣等猶恐耳目所及一時難周並恐有窒礙遺漏之處復札飭通永道坐轡廳轉飭通州知州漕運通判等據實稟覆亦與臣等籌畫之處大意相同現在核實計算錢糧大致不過三萬兩之數伏念潮白溫榆兩河漫溢有關民生係地方官應辦之事且兩河中間爲東西通行之大道現在仍有積水不特有礙行旅且係踰路經由之處相應請旨飭下直隸總督會同倉場侍郎自行籌款趕緊興修以衛民生而濟漕運仍遵例報銷以符定制

竊惟運河之設有減河因時啓閉所以旁殺水勢免致橫流法至善也山東恩縣境內之四女寺減河引入德州境內而德州境內又有哨馬營減河皆向東北流入直隸吳橋縣境內之玉泉莊而合爲一瀆歷經甯津南皮樂陵鹽山慶雲諸縣界至山東海豐縣老黃河口入海往年此兩減河每值運河漲溢則提壩洩之以分其溜而運河不至漫溢若運河水落則仍下板閉塞之故數百年畿南州縣從無水患乃自咸豐年間山東樂陵縣民惰農自安不執河道轉以水至無歸與訟遂築塞上遊之四女寺減河而哨馬營減河亦卽聽其淤漫高於平地時因樂陵一縣之阻撓而並廢直隸山東之利濟因噎廢食畿南水患由此起矣減河腦口既湮運河水不能仰入其下流雖可受水而皆乾涸無涓滴之流以致運河不克分消自同治七年山東德州北境老虎倉決口淹灌直隸吳橋東光南皮鹽山諸縣九年又於德州北境之桑園南決口淹灌直隸吳橋東光諸縣十年又於德州北境馮羅屯南小楊莊決口淹灌直隸吳橋諸縣如前迄今光緒九年復於德州小楊莊堤岸開決淹灌直隸吳橋東光南皮諸縣爲害尤烈畿南州縣連年迭被德州水害而河堤開決之處係在德州極北邊界所淹德州地面不過數里故山東巡撫率皆漫不加意任其北流泛濫縱橫數百里浸壞各州縣民居房屋無算漂沒各州縣田地墳墓無算而小楊莊決口在德州又不亟思修築九月間運河水以歸槽遲至十一月始興工堵塞畿南十數州縣地糧迭被蠲緩自今以往不加修濬民生之疾苦國課之虧短何可勝言耶且聞此次小楊莊決口實係馮羅屯及小楊莊居民所私行掘開者前因同治十年該處決口凡鹹鹵之地一經河泥肥壅悉變膏壤而套堤之內尙有窪坑數處思欲填平又惜人力因見運河泛漲遂於堤脊引水入灌初不意其決裂至於此極也聞之河濱老農凡河決處五里之內皆渾水最能持淤水退卽爲腴田至十里外水漸清而淤亦漸淺若二十里外盡清流矣如馮羅屯小楊莊近堤巖場往年地價不過三千文一畝自同治十

年決口挂淤後每畝可值三五十千此沿河居民所共知者故此日之決口非但無損於德州實且有益於德州其害乃全在畿南耳查同治十一年天津道丁壽昌因河決爲害會委員挑濬宣惠河矣夫宣惠河故道自山東德州境內北流入直隸吳橋縣西境又東北入東光南皮一縣界至劉蛤蟆莊分爲南北二支南支爲宣惠正河東入滄州鹽山山東海豐縣界會四女寺減河東流以歸海其北支則別名石牌河自南支劉蛤蟆莊歧出東北流入滄州界與青縣之興濟減河合而東北流與滄州之捷地減河合而東北流至祁口入於海此宣惠河故道載在畿輔輿圖昭然可考者彼時丁壽昌委員修濬議自上遊動工故先於吳橋縣起手乃迄至與山東德州交界地方之王指揮莊因係隔省呼應不靈遂卽截然而止下遊州縣如東光南皮者見吳橋爲山東德州阻工則上遊無所承接將全河棄爲無用故皆輟工未修而吳橋境內獨費民間數十萬貫錢迄此上無所承下無所注之乾河一道豈意本年德州小楊莊復決淹灌如同治十年時由宣懷故道北去而南皮滄州一帶因昔年並未修濬遂皆曲防以禦之東光縣被水災民思掘其堰遂被南皮縣民轟擊立斃四五十人貽害乃至於此可爲浩歎嚮使於同治七年九年十年三次被水之後濬宣惠河由山東德州協同辦理俾宣惠河頭上承哨馬營減河則東光南皮滄州等處必皆一氣呵成豈僅吳橋一縣挑挖而已哉如遇水發亦有減河爲運河之尾閘更有宣惠河爲減河之支瀆又何至浸沒田禾衝壞民舍爭圩劫搶釀成巨案耶考運河上遊本受衛河清淇諸水至山東會汶沂而爲會通河北入直隸以利轉漕今自南糧皆由海運而運河遂無關緊要殊不知黃河係穿運而過而今日運河中且分有黃流不有減河奚以洩乎減河之在直隸者昔爲捷地興濟兩處光緒六年直隸總督李鴻章復於靜海縣南之靳官屯添挖減河東下入天津縣界與興農鎮營田河渠同歸於海此誠相時度勢意美法良無如運河上游在山東者其四女寺哨馬營兩處減河已先壅

閉譬之病在胸腹而僅於股趾多方補救亦無裨益也且此於本無減河之處而加增之山東乃於本有減河之兩處而並塞之亦殊非 朝廷弭患衛民之至意應請 飭令直隸總督會同山東巡撫將四女寺哨馬營兩處減河臚口修濬仍以時開放並於兩減河下流飭各州縣挑挖疏通更令宣惠河頭上接德州哨馬營減河其下游東光南皮滄州等處亦均實力修濬庶運河水有分消不至潰決堤防爲民巨患矣倘款餉無著祈飭核督撫於查明覆奏後暫借部帑十數萬金及早興修卽由該二省分成陸續歸償而畿南各州縣從此不受水患錢糧卽勿庸獨緩所得之數實倍於所借之數矣

再凡河工所稱爲民修者乃係沿河村莊出夫修築凡他徭役一應皆免今山東德州小楊莊民既私掘官堤於前復修理遲延於後情實可惡居常旣不應差徭臨時復任意延擱直至隆冬地凍始厝浮土於其上排薪而束之工旣不堅料更不實無惑乎一遇泛漲畿南各州縣卽受其害也又德州老君堂地方與直隸之景州吳橋交界最爲險工其堤岸屢被伏汎衝刷日就卑薄如此處決口則景州吳橋河西一帶村莊盡成澤國而於老君堂居民卻無干涉聞今年運河水溢景州紳民赴德州呈訴求爲修防該州傳訊老君堂居民到案者均老邁龍鍾以少壯出外謀生不能脩工爲詞其意欲將此段險工俟運河水漲時令景吳二處居民代爲搶險脩築自此以往作爲成例永遠推諉於景吳兩處而彼旣置身於局外又得減免差徭其居心實屬險詐應請 飭令山東巡撫轉飭德州知州遇運河水漲時或照舊令該處居民實力修防或稟請撥給兵勇協同修理總期無害於直隸州縣方爲上策

再宣惠河道所佔之地其在直隸吳橋東光諸縣皆係升科納糧之恆產並非官地荒廢可比同治十一年間天津道委員挑挖並無興訟者良以民知公事爲重故不敢惜地自私也然其地亦不至全棄每年秋後水涸

尚可種麥至麥秋後遇運河伏汎漲時始偶有水耳今臣請令直隸吳橋之宣惠頭河直上接山東德州哨馬營減河彼德州必以侵奪民田恐民失業與訟藉辭搪塞不令舉辦不知吳橋德州交界之王指揮莊已近運河隄岸凡近運河之處兩邊皆餘有官地後爲奸民竊據由來已久祇須於近河堤旁官地向南挑挖使宣惠河頭直上接哨馬營減河則一逢堤屆卽如燕翼雙分一向東北會四女寺減河一向北會宣惠河其消水實爲至速夫以鄰爲壑仁政所懲廢務玩時官常所戒直隸與山東雖分兩省實爲比鄰倘秦越視之將患難相恤守望相助之謂何伏乞 飭令該督撫等通籌全局切勿聽其阻撓致貽畿南巨患民生幸甚

遵 旨查明四女寺哨馬營兩處減河隘口情形疏

山東巡撫 陳士杰

竊臣承准軍機大臣字寄光緒九年十二月十五日奉 上諭御史劉恩溥奏畿南州縣連年被水請飭將山東恩縣境內之四女寺及德州境內之哨馬營兩處減河隘口等因欽此遵經飭委候補知州許祺身前往查勘並咨直隸督臣李鴻章一併委員勘辦去後茲據許祺身稟稱四女寺減河東省僅轄五十里河屬恩縣下接德州歷吳橋東光而至海豐縣入海其在東境者共長九千二百八十八丈面寬十餘丈至二十丈深一丈七八尺不等道光四年前撫臣琦善會經大加疏濬並指撥款項作爲歲修積數年挑挖一次軍興以後庫款支絀兼以黃流改道漕運無多遂致暫行停辦而口門石閘猶存河身雖有積淤堤岸均屬可辨間有淤高之處爲附近居民鑿成田地並無墳墓村莊挑修尙易爲力哨馬營減河在德州城北十里乾隆初年卽已廢棄河身全行淤塞減水石閘亦均坍塌該處與四女寺減河均距不遠同一分殺水勢故自乾隆以後凡講求水利者皆專注於四女寺一河今若開挑四女寺工段正不必再辦哨馬營致糜巨帑等情臣詳加察核參稽案牘均屬相符伏查運河水勢每年大小無定如值來源盛漲則須啓支河以便宣洩其哨馬營減河久成平陸

當軍興以前南糧河運之時卽僅藉四女寺一河爲分洩盛漲之路現在籌議興挑自應照舊辦理不必二者並行至四女寺減河亦經年久失挑近來伏秋大汛異常漲滿德州小楊莊等處每有潰堤之患不惟直境被淹東民亦苦水災誠如該御史原奏亟應大加修濬惟查此工從前有歲修專款歸運河道經理自軍興停辦以後歷年如何收存臣衙門無從知悉應請旨飭下河東河道總督轉飭運河道詳細查明並再委員覆勘估計工需核實籌辦臣仍一面飭查督同設法興修以紓民困至德州小楊莊上年決口時經臣節次嚴催堵築祇以水勢未退辦理稍有遲延當經奏明在案昨據該州稟報恐各工壓土未堅現在捐資集夫培築一律穩固臣已飭令督率附近居民隨時認真防守並查勘其餘殘缺堤岸逐段修培不准再有疎虞除東光等處河道應如何挖挖疏通由直隸督臣李鴻章勘明具奏外所有遵旨查明山東境內四女寺哨馬營兩處減河缺口情形謹恭摺覆奏

照章估築攔河大壩疏 光緒十一年

覺羅成孚

竊照泇河廳屬微山湖爲東境入開江省邵宿運河濟運水櫃最關緊要定例收水以一丈五尺爲度歷屆存水總未能悉符定議而所短無多尙不至十分消耗本年春夏以來雨澤稀少來源缺乏本已短絀繼以四五月間新漕北上節次鋪水宣濟仍有續耗遂致盆形枯涸該湖自豐工黃水漫注後湖底淤墊高窪不平現量至深處尙存水七八尺淺處僅存二三尺甚有湖底涸露之處實爲向來所未有若不及早籌計不惟來歲加運漕糧未易浮送卽向年江北一隅亦恐攢挽棘手奴才焦思輾轉寢饋難安疊經檄飭運河道督率廳營汛聞各員將如何設法收水機宜妥籌趕辦去後茲據該道廳稟稱微河淤蓄向以坡水爲大宗本年曹單一帶未得透雨無水可收雖汶泗諸河疊經漲發在淺窄運河則已拍岸盈堤幾難容納迨入寬大湖面則又散漫